



მწვანე ალტერნატივას შენიშვნები

შპს „არ ემ ჯი აურამაინის“

სასარგებლო წიაღისეულის გადამამუშავება

ოქრო-პოლიმეტალური მადნების გადამამუშავებელი საწარმოს

მონყოების და ექსპლუატაციის პროექტის

გარემოზე ზემოქმედების შეფასების ანგარიშის განხილვის თაობაზე

30.03.2021

წარმოგიდგინებ მწვანე ალტერნატივას შენიშვნებს გარემოს დაცვისა და სოფლის მეურნეობის სამინისტროს ვებ-გვერდზე 2021 წლის 5 თებერვალს [გამოქვეყნებულ](#) შპს „არ ემ ჯი აურამაინის“ სასარგებლო წიაღისეულის გადამამუშავება ოქრო-პოლიმეტალური მადნების გადამამუშავებელი საწარმოს მონყოების და ექსპლუატაციის პროექტის გარემოზე ზემოქმედების შეფასების (გზმ) ანგარიშის და მისი განხილვის თაობაზე.

ტრანსპორტირების ზემოქმედება

გზმ დოკუმენტიდან ირკვევა, რომ მადნის ტრანსპორტირებისთვის კომპანია უკვე არსებულ საავტომობილო გზებს გამოიყენებს. როგორც სკოპინგის, ასევე, გზმ ანგარიშის საჯარო განხილვაზე, ბოლნისის მუნიციპალიტეტის წარმომადგენელმა აღნიშნა, რომ სატრანსპორტო დერეფანი გარკვეულ ადგილებზე პირუტყვის გადასარეკ ტრასებს კვეთს და სათანადო შეფასებას საჭიროებს. თუმცა, ეს საკითხი გზმ ანგარიშში მაინც არ აისახა.

ანგარიშის მიხედვით, ბექთაქარის საბადოდან მადნის ტრანსპორტირება განხორციელდება მთელი წლის განმავლობაში, ყოველდღიურად, 24 საათის განმავლობაში. დანართი 1-ში წარმოდგენილია მადნის საზიდი ავტოსატრანსპორტო საშუალებების გადაადგილების გრაფიკი (გვ. 313). ცხრილებიდან ირკვევა, რომ ტრანსპორტის გადაადგილება მხოლოდ 03:10 საათიდან 08:00 საათამდე შეიზღუდება. გზმ დოკუმენტიდან ასევე ირკვევა, რომ გარკვეულ მონაკვეთებზე, მძიმეწონიანი მანქანები მჭიდროდ დასახლებულ უბნებს გაივლის.

გარდა იმისა, რომ ეს იქნება ძალიან მნიშვნელოვანი უარყოფითი ზემოქმედება ამ ტერიტორიებზე დასახლებული ადამიანების საარსებო გარემოზე - ატმოსფერული ჰაერის დაბინძურება, ხმაური, ვიბრაცია, ადამიანებისა და პირუტყვის გადაადგილებისათვის მომეტებული საფრთხე, ღამის საათებში მძიმეწონიანი მანქანების გადაადგილებით გამოწვეული ხმაური და ვიბრაცია ამ ზემოქმედებას დაუშვებელ ზღვრამდე ზრდის.

საზოგადოების ინფორმირებულობა

როგორც ანგარიშიდან ირკვევა მადნის ტრანსპორტირებისთვის გამოყენებული იქნება არსებული გზები, რომლებიც მდებარეობს სოფლების: ბერთაკარი, ძეძნარიანი, ძველი ქვეში, ქვეში, ჭავჭავიანი, კიანეთი და დაბა კაზრეთის მიმდებარედ. 2021 წლის 15 მარტს ჩატარდა გზმ ანგარიშის საჯარო განხილვა. შეხვედრაზე როგორც მწვანე ალტერნატივას, ასევე ბოლნისის მუნიციპალიტეტის წარმომადგენლის ერთ-ერთი შეკითხვა/შენიშვნა ინფორმაციის გავრცელებას ეხებოდა. შეკითხვაზე, ფლობდა თუ არა ზემოთ ჩამოთვლილი სოფლების მოსახლეობა საჯარო განხილვის შესახებ ინფორმაციას; იყო თუ არა ამ სოფლებში განცხადებები გაკრული - სამინისტროს წარმომადგენელმა უპასუხა, რომ ასეთი რამ არ მომხდარა

(ინფორმაცია განთავსდა მხოლოდ დაბა კაზრეთში და ბოლნისის მერიის შენობაში, ასევე ონლაინ სამინისტროს ვებ-გვერდზე).

გამომდინარე იქედან, რომ პროექტის ზემოქმედების ქვეშ ექცევა არა მარტო ერთი დასახლებული არეალი (დაბა კაზრეთი), არამედ ექვსი სოფელი, სამინისტრომ უნდა უზრუნველყოს საჯარო განხილვის შესახებ განცხადების გავრცელება ზემოთხსენებულ სოფლებში (საჯარო ადგილებზე, ინფორმაციის გავრცელების დამკვიდრებულ ადგილას: ტრანსპორტის გაჩერებაზე, სკოლასთან, სკოლამდელი აღზრდის დაწესებულებასთან, სავაჭრო ცენტრთან, ფოსტის ოფისთან ან/და საზოგადოებრივი თავშეყრის სხვა ადგილებთან).

მიგვაჩნია, რომ საზოგადოების სათანადო ინფორმირების გარეშე ჩატარებული შეხვედრა არ შეიძლება ჩაითვალოს საჯარო განხილვად. სამინისტრომ უნდა უზრუნველყოს დაინტერესებული პირების სათანადო ინფორმირება საჯარო განხილვის შესახებ, მიაწოდოს ინფორმაცია პროექტის შესახებ და მისცეს პროცესში მონაწილეობის შესაძლებლობა. ამ პროცესის გარეშე გადანყვეტილების მიღება იქნება მოქალაქეებისათვის კონსტიტუციით, გარემოსდაცვითი შეფასების კოდექსითა და ორჰუსის კონვენციის გარანტირებული უფლებების უხეში დარღვევა. ასევე, მომავალში, ზემოქმედების ქვეშ მოქცეული მოქალაქეების მონაწილეობის გარეშე მიღებული გადანყვეტილების შედეგად წარმოქმნილი კონფლიქტური სიტუაციები იქნება, მხოლოდ, სამინისტროს მიერ არასათანადოდ წარმართული პროცესის დამსახურება.